



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :



Tir Yimym



tir_yimym



tir yimym

TAPAK 7

Khalid Jamil India tebur football team coach kümogo

Gaza nung chiyongtsü alemba reprangtsü US envoy Israel tongogo

VOL. XXII ISSUE NO. 288 (ADOK 288)

DIMAPUR

KÜPTOKÜ (SATURDAY)

LUROI (LUROI) 02, 2025

₹ 5.00

Assam sorkari mapa shidak inyakogo: ARWO

Dimapur, Luroi/August 01 (TYO): Assam sorkari Golaghat district nung Uriamghat kübok Rengma Reserve Forest nung ozüing alema arua alirtemaridokba asoshi Assam Chief Minister Himanta Biswa Sarma dang pelaba lemsateper, ta All Rengma Welfare Organisation (ARWO) sangdong ka ajanga ashi.

Iba inyakyim ya region nung lisopur temeden wazüka ayuba, ochi obendang agütsüba aser law and order shidak amshiba nung tongtipang mera ka alitsü.

Tesüiba küm ishika tsüingta Rengma Reserve Forest tesem aisülen temelaba makai ali agia arur, koba libajen aser yangji aliba takumsangnu asoshi kisüing tongtipang masü saka Rengma Naga kin atema sobaliba aser akhi puti otsü nunga tongtipang lir, koba region nung lisopur kin tejentiba rongnung ka lir.

Tang aliba 'administrative boundaries' aser 'political developments' marudang nungi iba ali ya Rengma nung tasoli liasü. Ibai Rengma nung atema takum senmang ka lir, koba pei ayak aser sobaliba nung taktepa lir, ta ARWO ajanga shi.

Rengma nung tasoli ya Rengma Reserve Forest, Rengma River valley, Rengma Tea estate, Nambor Reserve Forest, Gholapani, Haldibari, Lisa goan,

Rengma Pathar, Uriamghat, Sarupathar areas, Naojan areas, Golaghat district kübok Naokhuti areas; tang Karbi Anglong kübok Nambor Reserve Forest, Kaliani Reserve Forest, Dhansari Reserve Forest, Doldali Reserve Forest, Diphu River Valley, Jamuna River Valley; aser Tseminyu district densema Nagaland nung shilem kar lir.

Lisopur temeden wazüka ayuba den külemi illegal migration tebilemtsü bentetsüba Chief Minister Sarma dak tangatetba aliba asoshi tenüingsang agütsür, koba ajanga Assam, Nagaland aser danga Northeastern states sobaliba-yimtenren tesendaktep nung kanga mejungi kongshia arur, ta ashi.

State arütsü kumzükä ayutsü atema teyakyak mera agiba atema CSOs, lanur tentet, NPGs aser Nagaland Chief Minister Dr. Neiphiu Rio nung dang pelaba lemsateper.

ARWO ajanga Government of Assam dang maneni iba ama ozüing agi melaba aser mapa shidak inyaktsü, Rengma Reserve Forest kumzükä ayutsü aser akhi alemli nungi Rengma Naga nung li nung ozü temeden wazüka ayutsü asoshi mera agütsü ayongzüker. Tarutsü nung ozüing alema item ali magütsü asoshi teti asoshi mera agütsü ajungshir, ta ARWO sangdong ajangasa ashi.

SIR mechi Manipur President's Rule atsülangtsü mejembitet

New Delhi, Luroi/August 01 (Agencies): Bihar indang electoral rolls atema Special Intensive Revision (SIR) dak sendakba nung Hukulbarnü opposition temi tanen makai longkak aitba ajanga Rajya Sabha nung senden junga mementeti Manipur nung President's Rule atsülangtzü atema Parliament nung onük benoka mejembitet.

Manipur nung President's Rule atsülangtsüba onük ya Hukulbarnü jembitsü renema liasü, saka azüdokshi agi kongshir aliba Manipur nung central rule atsülangtsü onük House nung benoka mejembi aser ano Carriage of Goods by Sea Bill, 2025 mesüra private members' business kecha benoka mejembitet.

Bihar nung Election Commission ajanga SIR agiba jembitsü aser tangsa agienang ta opposition MP temi tashiyim agi ola tulu adoka longkak aitba mechi Zero Hour aser Question Hour magiteti anendaka liasü.

TMC, DMK, AAP aser Congress nungi MP temi well of the House telungi aütsü meranga rongrong adok. Marshals aser CISF personnel temi parnok maitdaktsütsü meranga nokdang, aser iba yongji ozüing yanglur kari paramilitary temi Rajya Sabha

agiogo ta ola adok.

TMC nungi Derek O'Brien, Nadimul Haque aser Sagarika Ghosh, DMK nungi Tiruchi Siva aser AAP nungi Sanjay Singh nungertem iba well tonga oa yimym ayima liasü.

Security timba kumaka tetsür MP tema well telungi melepora ia tenokdangba agüja aliba anema longkak aita liasü.

Nikongdang Ghanshyam Tiwari menden sür Question Hour tenzüksü merang aser Congress MP Vivek Tankha dang supplementary asüngdangtsü ashi.

Ajisüaka Tankha-i memulung aser House ya yimya shidak nung masü ta shi. Tanen makai meinprngba ajanga mendeni anogo ka atema House senshidaktsü. Rajya Sabha ano Hombarnep adenshitsu.

Chamber telung nung CISF personnel tem aliba atema Congress lenir Mallikarjun Kharge aser Jairam Ramesh nati aitsü. Security forces temi Council of States agiogo aser iba amai Parliament puti otsü nung matalokdang, ta Ramesh-i aitsü.

Opposition temi SIR exercise jungunga jembitsü akhanger aser Bihar nung küm tatemlen Assembly elections agütsü lia asaa iba mapa inyaker ta aitsür.

Tsüngremmong ajanga Ao kin lungjemdaktsür: Dr. S.C. Jamir



Kisama Amphitheatre, Kohima nung August 1, 2025 nü Kohima Aor Telongjem-i Tsüngremmong benjong ayongzüka amungdang Padma Bhushan sempet angur aser taoba mapang Governor aser Chief Minister inyaka alisang Dr. S.C. Jamir-i jembidang tangokba noksa nung angur.

Dimapur, Luroi/August 01 (TYO): Kisama Amphitheatre, Kohima nung August 1, 2025 nü Kohima Aor Telongjem (KAT) Tsüngremmong benjong munga liasü.

Padma Bhushan sempet angur aser taoba mapang Governor aser Chief Minister inyaka alisang Dr. S.C. Jamir-i iba sentong nung jembidang, Tsüngremmong ya benjong balaka lir, koba ajanga Ao kin lungjemdaktsür ta ashi aser nüburtem dang lungjema alitsü ayongzüker.

Nagaland ya Tsüngremi shimba li lir ta pai ashi Naga nung rongnung Khristan yimsü prokshia aoba indang lemsatepa liasü.

State ya tamangba yimsü balala aliba tesemtem agi meketbanger liaka, Dr. E.W. Clark ajanga

Khristan yimsü ya Aor tem mezüing atong aser yangnungjaki Ao missionary temi danga Naga kin tem dangi prokshi, ta ashi.

Ibai asü akumtsüba masü saka Tsüngrem tenüing asangtsü kuli ka lir, ta pai ashi.

Tanü Naga lima nung Naga movement telemsa adoka aliba, ochimashi agi sünga aliba aser telungjem makaba indang Dr. Jamir-i temulung shiranga ashi aser paisa Nagaland tajungba akumtsü asoshi Aortem dang ochishir lenir shimtsü ayongzüka liasü.

Minister, Rural Development and SIRD, Metsubo Jamir-i benjong salem lemsatepdang, Tsüngremmong nükjidong ya temoatsü meshiba masü saka nüburtem madak temoatsü jenti agüja aliba asoshi tenüingsang

agütsüba mapang lir, ta ashi.

Shiri tenüingsang tali agütsür, pari temoatsü tali angur, aser nisung ka takum nung tenüingsang agütsüba nung tashi lir, ta pai ashi.

Minister Metsubo-i lanurtem dang tesüiba mapang nungi yimya tajungtem angazüka meranga inyakba tanüla adokdaktsütsü ajungshia liasü.

Pai sobaliba maitsü kanga tongtipang aser itemji wazüka ayutsüla aser asen tetsü oshi jembitsü ashi. Oshioben ya sobaliba temulungjang lir, aser aji mesamadaktsü amshiba ajanga asen senmang takum lidaktsür, ta ashi.

Sentong nung Ao Senden tir Marsanen Imsong-ia tayongzüka o jembi aser Dobashi Mokokchung, Lanutemshi Longkumer-i Tsüngremmong ratet shia liasü.

Nagaland maitsü wazüka ayutsüla, alima dang sayutsüla: CMDr. Rio

Kohima, Luroi/August 01 (TYO): Indian Constitution indang Article 371 (A) kübok wazüka aliba Nagaland indang maitsü kumzükä ayutsü aser alima sapang nung ajungkettsü asoshi asendenshir inyaktsü Nagaland Chief Minister Dr. Neiphiu Rio-i Hukulbarnü ayongzüker.

"Nagaland's Global Footprints: Cultural Diplomacy and International Engagements" nungja agütsür State Banquet Hall, Kohima nung sentong ka agiba nung jembidang, asen sobaliba senmangren asoshi Nagaland tejak tentetsüsa aser sobaliba tajung alima den lemsateptsüla, ta Dr. Rio-i ashi.

"Iba Article ya asen tamendak dak lir. Iba yagi asen yimya, asen li, aser sobaliba kumzükä ayur. India nung state kata nunga asenok aliba ama mali. Asenoki iba jenjang angatetsüla aser nüngdakba nung iba maongka ya amshitsüla," ta Rio-i Article 371 (A) indang ashi, koba ajanga Nagaland nem tamangba yimsü, loktiliba, yimya balala, ali aser yangji aliba rongsen asoshi tashi balaka agüja lir.

Chief Minister Dr. Rio-i Naga nung artist aser Tourism aser Industries department tem nungi ketdangsurtem dener July 10 nungi 17 tashi Japan aser Russia linüktem

semdangba indang lemsateptsü asoshi iba sentong ya ayongzüka liasü. Ministry of External Affairs, Government of India teyaritep nung ayongzüka sentong nung India nungi state trok jaokba nung Nagaland ya ka liasü.

Nagaland indang cultural troupe ya Moscow, Russia nung Bharat Utsav - Festival of India nung shilem agütsü asoshi alakteta jaok aser Russia ketdangsur nungja pelaba lemsatepa liasü.

Kohima nung iba sentong agidang Russian Embassy ajanga tepela temaitsü kulizüing kaket agütsüba amokja liasü.

Iba ama international sentong nung shilem agiba ajanga 'soft diplomacy' adokdaktsür aser tarutsü nung sobaliba, academic aser rongsenketzüing tsütsü linük kati ka den lemsateptsü asoshi kishi lapoktsür, ta pai ashi.

Human resources development, environmental sustainability aser healthcare amala tongtipang sector nung amalitep akatsü asoshi Japan nung Memorandum of Understanding ka zülutepe liasü.

Alima sapangtem nung Nagaland maitsü aser sobaliba sayutsü nüngdaker, asenoki asen sobaliba wazüka ayuba kisüing masü saka alima dang tasü ita sayutsüla, ta Chief Minister-i ashi.

Hornbill Festival ayongzüka nung takok tulutubaji Naga nung lungjemdaktsüba aser alimai temulung agütsüba ya lir, aser iba amala sapang ya maneni tashi itshitsüla, ta pai ashi.

"Asen maitsü, sobaliba aser yimya balala wazüka kisüing meyui alima den lemsateptsüla," ta ashi.

Tesüiba mapang tim masüba mapa inyakba nung kongshia jembidang, tekolak teret amala Naga nung teret UK nung aliba museums nung yua aliba indang Rio-i ashi aser item ya tim yimya nung meyipa bener shilangtsü aser Naga nung otsü shidakba bendentsü asoshi research aser museum projects tem inyaktar ta ashi.

Asenok aintsüla, Nagaland asoshi mangdang ulushitsüla. Made in Nagaland aser Naga Crafts ya global brands kumdaktsütsüla, ta pai ashi.

Paisa education, healthcare aser sustainable development densema sector balala nung dangar den teka amteper inyaktsü nüngdaker aser Japan aser Russia ama linük balala den lungiemer inyakba ajanga state tarutsü jenjang melenshitsu tsü ta ashi.

Iba sentong nung Deputy Chief Ministers T R Zeliang aser Y Patton nung dena liasü.

ATI-i Mid-Career training ayongzüka agi



Dimapur, Luroi/August 1 (TYO): Administrative Training Institute (ATI) Kohima-i ayongzüka, küm 5 nungi 7 tsüngda tajangshiba bena aliba Nagaland Civil Service officers 20 atema Mid-Career training katsüdar. Training ya July 31 nü tenzük aser August 2 nü tembangsü.

July 31 aser August 1 nü Director General (DG) of ATI, V. Shashank Shekhar IAS den sensaksem sentong ka agiba mapang officer trainees tem dang parnok tajangshiba aser talisa nüburtem libaliro koda ajungketsütsü iba indang lemsateptsü asüngdanga liasü.

DG-i ashiba agi, nisung mashi kati tebilemsü balala indang shitettsü saka item ya bentettsü atema lenmangtem sayutsü kanga tongtibang. Paisa, civil service nükjidadong tongtibangtibaji nüburtem atema

inyaktsü asoshi lir, ta ashi. DC-i, officer trainees temi parnok tajangshiba lemsatepba atema parnok nem tenüngsang agüja liasü.

Officer trainees temi benokdangba onüktem rongnung, rongsenketzüng ajungketsü aser mapa inyaktsü atema maongka agütsütsü atema tesendaktep tajungba küma yanglushitsü; sorkar scheme tem mapa shitak nung metetdaksütsü atema inyakyim ka benoktsü, ajita asünungdang dang nbürtemi teyari agitettsü; rongsenketzüng nung terenlok atema aluyimba jenjang ajungketsütsü atema rangloker inyaktsü, kong crop insurance, value addition aser shishilembadak balala den sendaktepba densema lir; mapa angutsü aser libaliro ajungketsü atema nüburtem nem occupational skills agütsütsü;

human resource management atema inyakyim tedangshi ka benoktsü; inyakyim tajungba kümdaktsütsü atema department tem lokteptsüba; power supply tajungba kümdaktsütsü atema mini solar grid tem amenoktsüba; health infrastructure ajungketsüba nung densema liasü.

Yimdak yimtsüngtem dak rangloker inyaktsü atema tashi itshitsü asoshi jenjang agitsü aser kodaser lanurtem temesepba mozü achiba nungi pila lidaktsütsü, item onüka benoka sensaksema liasü.

Sensaksem sentong nung Joint Director, ATI, Er. N. Moa Longkumer, Joint Director, ATI, Kaholi Sema, Deputy Director, ATI, Imlibenla Jamir, Lecturer, ATI, Peter Konyak, aser training course coordinator, Deputy Secretary, ATI, Asalie Lese nungeria shilem agia liasü.

Social Welfare Dept-i PMMVY enrolment Drive indang metetdaksü

Dimapur, Luroi/August 1 (TYO): Social Welfare Department-i, Pradhan Mantri Matru Vandana Yojana (PMMVY) atema tang state-level Special Enrolment Drive ka agia aliba indang metetdaksüogo. Iba inyikyim ya state kübok district 17 prongla nung benoka inyakdar ta kasa sangdong ajanga metetdaksü.

Department-i ashiba agi, Pradhan Mantri Matru Vandana

Yojana ya Mission Shakti kübok centre-i sponsor asüba maternity benefit scheme ka lir, koba ajanga mashisa aliba aser mama yongdakja aliba tetsütem nem mezügbuba tanur asoba mapang sen 5,000 agütsür aser tanabuba tanur tetsür chanu sora sen 6,000 agütsür.

Iba tajangzük ya Direct Benefit Transfer (DBT) ajanga agütsür aser iba ya tanur sor ita teku tashi nung

agitettsü. Temsüa aliba candidate temi parnok anasatiba aliba Anganwadi Centre/CDPO/DPO office mesüra District Hub for Empowerment of Women semdangtetsü.

Iba dak sendakba nung osang tejangjaba agitsü atema State Women Helpline-181 (or 94852 39098) mesüra National Helpline Number for PMMVY-14408 den tongteprateptetsü.

ALTC-i Tsungremmong nüngdem nung merekmeju sentong ayongzüka agi



Dimapur, Luroi/August 1 (TYO): Tsungremmong benjung amungba nüngdem nung Ao Lanur Telongjem Chümoukedima (ALTC)-i August 1 nü merekmeju sentong ka ayongzüka agiogo. Lokti atema tatishitsü aketba mapa tajung inyaka iba benjung amungtsü nükjidadong nung ALTC-i iba sentong ya ayongzükogo.

Taküm iba merekmeju sentong ya Chumoukedima

nung Patkai Bridge merekmejuba aser painting sütsüba dak rangloker inyaka liasü. Iba merekmeju sentong nung Aoer tem aikati jangrabangra shilem agiogo aser iba ajanga tzi mopung mereka ayutsü aser pei khuret angateta inyaktsü bendanga agütsür aliba sayur.

Iba inyakyim ajanga tanga kin aser lokti tentettem pei sobaliba benjungba nung shilem ka ama lokti asoshia mapa

tajung inyaktsütsü ajungmesotsü imlaba ALTC-i lemsatep.

Ao Lanur Telongjem Chumoukedima-isa, iba merekmeju sentong nung shilem agir ajak dang kanga pelaba lemsatepa liasü. Kasa mapang nung Chümoukedima Town Ward-1 Councillor aser lar kibongi iba sentong nongita yariba den sentong nung shilem agir ajak nem tachitajemtsü agütsüba atema kanga pelaba ALTC-isa lemsatepogo.

NPF-i Aoertem den Tsüngremmong salem lemsatep

Dimapur, Luroi/August 1 (TYO): Naga People's Front (NPF)-i sangdong ka ajanga Aoertem den Tsungremmong benjung salem lemsatepogo.

Tsungremmong ya Aoer sobaliba nung kanga junga tera yangluoka lir aser iba benjung ya temaotsü asoshi tulusang tsüngrem nem tenüngsang agüja amungba benjung ka dang masü saka iba ya telongjem, yimjung aser sobaliba benjungba mapang ka lir. Iba mongpu nung lokti balala adenshia tepela lemsatepba den

tesendaktep akangshir aser putu ka nungi putu ka nem sobaliba balala belenzüka toktsür.

Benjung amungba mapang kibongtem tepela, anema aliba aser yimjiyimjung nung tokjang ta sarasademtsür. Tsüngremmong tanüla ajanga asen sobaliba wazüka ayutsü, tesunep nung alitsü aser terenlok asoshi külemi jajtsü atema asenok ajungmesodakjang, ta NPF Press Bureau sangdong ka ajanga metetdaksü.



Jharnapani nung August 1 nü 'Ek Ped Maa Ke Naam 2.0' sentong nung Chumoukedima DC, Poland John-i süngtong ka temtsüba noksa nung angur.

Art & Culture Dept-i tetushi atema lanur artist tem jaoker

Dimapur, Luroi/August 1 (TYO): North East Zone Cultural Centre, Ministry of Culture, Government of India, Dimapur-i, 2023-24, 2024- 25 & 2025-26 atema Young Talent Artistes Award asoshi application jaokogo.

Folk & Tribal Music/Song & Dance, Theatre, Dance, Drama, Mime, Painting, Wood, Cane & Bamboo Crafts, Traditional Handloom & Handicrafts, Pottery amala lenla nung tangar dang nungi alakteta tajungba shilem agitetba lanurtem iba tetushi asoshi jaokogo.

Arishi küm 18 nungi 30 (2023 küm March 31 nü tashi nung) tsüngda aliba lanur artistes/artisans tem iba tetushi atema apply asütsü temsüa lir. Takok angurtem nem senpet sen 20,000 den kuli kakat aser Memento ka agütsütsü.

Osang ajanga ashiba agi, candidate tem ya India nunger lisopur asütsüla aser Arunachal Pradesh, Assam,

Manipur, Meghalaya, Mizoram, Nagaland, Sikkim aser Tripura ta North Eastern State ti nungi lisopurtem asütsüla. Candidate tem shirnok taoba mapang iba amala tetushi (State/National) agizükogo, parnok iba scheme atema temsüa mali.

Temsüa aliba artistes/artisans tem dang office of the Directorate of Art & Culture/Cultural Affairs, Government of the concerned State mesüra Shilpgram, Panjabari, Guwahati & Headquarter Office, Dimapur nungi Application Form tem agizüktsü metetdaksüogo. Form ya NEZCC website <https://nezccdimapur.org.in/> / Home/ Advertisement nunga angutsü.

Application tem ya pei state Department temi asadangtsü. State Department-i shimba candidate tem indang application ya August 15 nü tashi nungbo NEZCC office atongtsüla. Iba sülen aruba application kecha magizüktsü.

Higher Education department-i metetdaksür

Dimapur, Luroi/August 1 (TYO): Higher Education department-i sangdong ka ajanga ashiba agi, Higher Education, Nagaland, Kohima kübok CSS-Post Matric Scholarships atema apply asüba ST kakatshirtem nem 'Family Income Certificate' agütsütsü atema Nagaland Angh-i, Deputy Commissioner, Revenue Officer aser Deputy Commissioner office nung Sub-Divisional Officer (SDO) rank

tashi nung aliba ketdangsürtem ajak temsüa aliba ketdangsürtem asütsü ta metetdaksüogo.

Ken o dak sendakba nung Department-i 2024 küm November 25 nü osang agütsüba ya magitsü ta metetdaksüogo.

Kasa sangdong ajangsa, iba osang atema Law & Justice Department-i 2025 küm July 23 nü temelaba agütsüogo, ta metetdaksü.



August 01, 2025 nü Patna nung Jan Suraj party Tir, Prashant Kishor aser taoba mapang BJP lenirtem- Sudhir Sharma aser Vinita Mishra na den film director Chetna Jhamb nunger tangokba noksa nung angur. Osangbenertem senden ka nung Sharma, Mishra aser Jhamb nungeri Jan Suraj party nung denogo.

Ireland nung India nunger dang kumkuma alitsü metetdaksü

New Delhi, August 01 (Agencies): Ireland yimtiba, Dublin nung aliba Indian Embassy-i Ireland nung alir India nungertem dang kanga kumkuma alitsü tekümdangtsü metetdaksü. Hokolbarnü Indian Embassy-i X ajanga, "Tawa Ireland nung India nungertem anema inyakba kanga bulua kümdar. Iba dak sendakba nung embassy-i Ireland nung ketdangsertem den tongtepratepa jembidar," ta metetdaksü. Embassy-i Ireland nung India nungertem dang pei taküm kümzüka alitsü atema kumkuma alitsüla aser nisung maliba tesemtemi maotsüla, ta metetdaksü. Indian Embassy-isa rongdak nüngdakba mapang nung parnok den

tongteprateptsü atema nungi National Gallery tashi longkak aita jaja. Parnok ket nung "Say no to racism" aser "Ireland is home" ozülu densema ozülu balala aika amer liasü. Irish police, An Garda Síochána-i, iba tatalokba ya nisung bendanga züngshiba dak sendakba ken o lir, ta metetdaksüogo. Iba dak alia takoksa angurtem atema ochi temeden takhangba agüja online petition ka tenzükba sülen tang tashi nung nisung 15,000 dak temai sign süogo. Ireland nung Europe nung masüba bendanger nütsüng teimbaji India nungertem lir. Ireland nung India nungertem Information Technology aser healthcare sectors nung kanga tongtibrang shilem agir.

Phone no. 08994 23734 aser E m a i l : cons.dublin@mea.gov.in lemsatepogo. July 19 nüa Dublin kübok Tallaght nung India nunger ka kanga mejungi amak. Irishi nunger tainlonglong telok kati India senso dakji tejak nung kotari agi aiben tsüngoktsü aser süoshi semzüksü. Ibaji aija linük tesem ajaklen nüburtemi tejashi lemsatepba den longkak aita liasü. Longkak aiterem rongnung India nungertem, Pakistan nunger aser Bangladesh nunger aika liasü. Irish nungertem-a karibo longkak aitba nungji shilem agia liasü. Nisung 800 dak tali adenshir Dublin City Hall

Taküm India nung tayimtsü tsükokba lendong 8 nung nisung 274 asü

New Delhi, August 01 (Agencies): Taküm küm India tayimtsü tsükokba tenzüker tang tashi nung linük nung tayimtsü tsükokba lendong 8 nung nisung 274 süogo, ta sorkari metetdaksü. India nung commercial tayimtsü ka, training agiba tayimtsü asem aser helicopter pezü tsükoka liasü, ta Brihostibarnü sorkari Parliament nung metetdaksü. Item lendong nung nisung ajak senteper 274 asü aser nisung 84 yirua liasü. Lok Sabha nung tasüngdangba ka langzüdang Minister of State for Civil Aviation, Murlidhar Mohol-i, item tayimtsü tsükokba tatalokbatemji Aircraft Accident Investigation Bureau (AAIB)-i bushisüngdang, ta metetdaksü. Item tayimtsü tsükokba lendong nung nisung teimtiba asübaji June 12 anogo nung

liasü. Ahmedabad nung Air India tayimtsü tsükokba lendong nung nisung 260 asü aser nisung 81 yirua liasü. April 22 nüa Gujarat nung helicopter ka tsükokba lendong nung nisung ka asü. May 8 nü Uttarakhand nung helicopter ka tsükokba lendong nung nisung trok asü aser June 15 nüa Uttarakhand nung helicopter ka tsükokba lendong nung nisung tenet asü. Item tayimtsü tsükokba lendong nung nisung ajak senteper 84 yiru aser yirurtem teimtibaji Air India tayimtsü tsükokba lendong nung ali nung alirtem yiruba liasü. Ano tanga tasüngdangba ka langzüdang Minister Mohol-i, 2015 küm nungi tenzüka tang tashi nung Indian civil-registered scheduled tayimtsü 18 tsükok, ta metetdaksü.



August 01, 2025 nü New Delhi nung Parliament kima opposition INDIA nungi MP temi Bihar nung Special Intensive Revision (SIR) anema longkak aitba sentong nung Congress MP tem-Mallikarjun Kharge, Priyanka Gandhi Vadra aser Pramod Tiwari, DMK MP TR Baalu aser tangartem noksa nung angur.

Linük tatong Tir election September 9 nü agitsü: EC

New Delhi, Luroi/August 01 (Agencies): Linük tatong Tir election September 9 nü agitsü aser kasa anogo nungjisa election agiba osangji sangdongtsü, ta Hokolbarnü Election Commission-i metetdaksüogo. July 22 nü tatong Tir, Jagdeep Dhankhar-i ajungbena tatong Tir menden nungi anenba ajanga iba election agitsüsa aküm. Iba election atema nominations tatembangbuba anogoji August 21 asütsü aser September 9 nü election agiba sülen kasa anogo nungjisa vote zünga osang metetdaksütsü. August 7 nü Election Commission-i iba election atema sangdong agütsütsü, August 21 tashi nung nominations file asütsü, August 22 nü nominations reprangtsü aser candidate-i tenüng agientsü atema tatembangbuba anogoji August 25 asütsü. Linük tatong Tirji electoral college-i shimtsü. Electoral College nung Parliament House anaprongla nungi züngsem ajak densema lir. Iba election atema candidate ji Rajya Sabha MP ka asütsüla aser arrshi küm 35 dak tema asütsüla. Tzüngluruwa mongpu Parliament senden tenzükba anogo nung linük tatong Tir aser Rajya Sabha chairman, Jagdeep Dhankhar-i ketdangsüa senden amenba sülen nikongdang pai ajungbena tatong Tir menden nungi anenba osang sangdonga liasü. Pa tatong tir kümsük abensatsü atema ano küm ana anünga liasü. Pai shidi ka ajanga Tir, Droupadi Murmu dang, "Kü temang anepalutsü aser medical tetuyuba tashi angaa ni linük temzüng nung Arlla 67(a) kübok India tatong Tir menden nungi anener," ta metetdakja liasü.

FORM NO. 14 [See Regulation 33(2)]	
OFFICE OF THE RECOVERY OFFICER- I/II DEBTS RECOVERY TRIBUNAL, GUWAHATI Suwarna Bhawan, House No. 12, New Town Path, Near Hanuman Mandir, G.S. Road, Ulubari, Guwahati- 781007 (Assam)	
DEMAND NOTICE Recovery of Debts & Bankruptcy Act, 1993 kübok Sections 25 nungi 28 tashi aser Income Tax Act, 1961 Second Schedule nung Rule 2 kübok notice agütsür	
RC/75/2024 CANARA BANK -Versus- M/S. HEENA COTTON INDUSTRIES	
To, (CD 1) M/S. HEENA COTTON INDUSTRIES, Proprietorship Firm Represented by Md. Elias Mansury, House No. 172, New Market, Golaghat Road, Dimapur, Nagaland- 797112. (CD 2) MD. ELIAS MANSURY, S/o Md. Younus Mansury, C/o Furnishing World, Near Central Plaza, Nyamo Lotha Road, Dimapur- 797112, Nagaland. (CD 3) MD. MOBIN MANSURY, S/o Md. Younus Mansury, C/o Furnishing World, Near Central Plaza Nyamo Lotha Road, Dimapur- 797112, Nagaland. OA/242/2022 nung Presiding Officer, DEBTS RECOVERY TRIBUNAL, GUWAHATI-i tetuyuba agütsüba nung ajemdaker Recovery Certificate nung aliba ama iba notice agütsür, nenok (Jointly and Severally/ Fully/ Limited) anema sentüsuh Rs. 40,91,892.90 (Rupees Forty Lakhs Ninety One Thousand Eight Hundred Ninety Two and Paise Ninety only) den pendente lite aser future interest @ 14.75% Compound Interest Monthly w.e.f. 01.05.2022 sentüsuh mouma tashi lir aser Cost Rs. 43,255/- (Rupees Forty Three Thousand Two Hundred Fifty Five only) lir.	
(1) Amount due as per the Recovery Certificate:	Rs. 40,91,892.90
(2) Interest from 01.05.2022 to 06.06.2024 @ 14.75% p.a.	Rs. 12,68,290.61
(3) Costs	Rs. 43,255.00
TOTAL	Rs. 54,03,438.51
2. Nenok dang iba notice agütsüba sülen anogo 15 tsüngda sentüsühji agüjang ta tuyur, mesüra Recovery of Debts Due to Banks and Financial Institutions Act, 1993 aser Rules nung ajemdaker inyakshangshitsü.	
3. Taruba ken o mangadangdangsa nenok indang kiojen affidavit ka nung sangdongang ta tuyur.	
4. Maneni ken o angdangtsü atema 25.09.2025 anogo nung anepdang 10:30 ako mmatongdang tsünglanglen sign süa alir matsüngdangi arung ta tuyur.	
5. Tekalen shia aliba sen dak alia nenoki item ya-a agütsütsüsa akümtsü: (a) Certificate / execution atema iba notice agütsüba nungi tenzüka sen tetemlok. (b) Iba notice aser warrant agütsüba den külemi sentüsuh alangzüksü atema inyaksangshidang teindokba sen ajak.	
10.07.2025 anogo nung tsünglanglen kü meyongnem aser Tribunal seal agütsür.	
RECOVERY OFFICER DEBTS RECOVERY TRIBUNAL GUWAHATI	

FORM NO. 14 [See Regulation 33(2)]	
OFFICE OF THE RECOVERY OFFICER- I/II DEBTS RECOVERY TRIBUNAL, GUWAHATI Suwarna Bhawan, House No. 12, New Town Path, Near Hanuman Mandir, G.S. Road, Ulubari, Guwahati- 781007 (Assam)	
DEMAND NOTICE Recovery of Debts & Bankruptcy Act, 1993 kübok Sections 25 nungi 28 tashi aser Income Tax Act, 1961 Second Schedule nung Rule 2 kübok notice agütsür	
RC/71/2024 CANARA BANK -Versus- M/S. T A ENTERPRISE	
To, (CD 1) M/S. T A ENTERPRISE, Represented by its Proprietor- Mr. Tewsu Ao, Arkong Ward, I M Road, Mokochung, Dimapur, Nagaland- 798601. (CD 2) MR. TEWSU AO, Son of Nungsang, Arkong Ward, I M Road, Mokochung, Dimapur, Nagaland- 797112. (CD 3) MRS. ASENLA LONGKUMAR, Wife of Sri Tewsu Ao, Messers Dimapur Glass, Nyamo Lotha Road, Dimapur, Nagaland- 797112. OA/189/2022 nung Presiding Officer, DEBTS RECOVERY TRIBUNAL, GUWAHATI-i tetuyuba agütsüba nung ajemdaker Recovery Certificate nung aliba ama notice agütsür, nenok (Jointly and Severally/ Fully/ Limited) anema sentüsuh Rs. 1,02,25,310.98 (Rupees One Crore Two Lakh Twenty Five Thousands Three Hundred Ten and Paise Ninety Eight only) den pendente lite aser future interest @ 13 % Compound Interest Monthly w.e.f. 01.05.2022 sentüsuh mouma tashi lir aser Cost Rs. 1,05,255/- (Rupees One Lakh Five Thousand Two Hundred Fifty Five only) lir.	
(1) Amount due as per the Recovery Certificate:	Rs. 1,02,25,310.98
(2) Interest from 01.05.2022 to 06.06.2024 @ 13% p.a	Rs. 7,93,330.58
(3) Costs	Rs. 1,05,255.00
TOTAL	Rs. 1,11,23,896.56
2. Nenok dang iba notice agütsüba sülen anogo 15 tsüngda sentüsühji agüjang ta tuyur, mesüra Recovery of Debts Due to Banks and Financial Institutions Act, 1993 aser Rules nung ajemdaker inyakshangshitsü.	
3. Taruba ken o mangadangdangsa nenok indang kiojen affidavit ka nung sangdongang ta tuyur.	
4. Maneni ken o angdangtsü atema 25.09.2025 anogo nung anepdang tsünglanglen sign süa alir matsüngdangi arung ta tuyur.	
5. Tekalen shia aliba sen dak alia nenoki item ya-a agütsütsüsa akümtsü: (a) Certificate / execution atema iba notice agütsüba nungi tenzüka sen tetemlok. (b) Iba notice aser warrant agütsüba den külemi sentüsuh alangzüksü atema inyaksangshidang teindokba sen ajak.	
10.07.2025 anogo nung tsünglanglen kü meyongnem aser Tribunal seal agütsür.	
RECOVERY OFFICER DEBTS RECOVERY TRIBUNAL GUWAHATI	



TIR YIMYIM YIMOBILEM (EDITORIAL)

DIMAPUR MONDAY, AUGUST (LUROI) 02, 2025

Ao oshi ya koma wazüka ayutsü ?

Taküm Kohima nung Tsüngremmung amongba sentong ya Ao temeja jembia amongtsü nükjiding nung renemba sentong ka liasü, ibayongji Ao mejembitettsü purtem nembo sentong nung shilem agitsü shinga nema magütsüi tuluba nungi tilaba tashi Ao oshi jembitetter Ao senso tajung lenirtem jaoka shilem agiba nguogo. Aji oda, shilem agirtem ajaki Ao oshi nung Ao oshi wazüka ayutsü nüngdakba indang jembidang kanga temulungsüa bilemer, kechiyong iba jagi Aotsür Aortem longjemdaksütsü aser ano khen Ao oshi jembia ochi aser temeim nung Naga lima yangushi tenzüksü. Naga nung rongnung lepteptsüngtep anendaksüba oshi ya English masü aser Hindi-a masü Ao oshi liasü. Kasaji, Naga nungertem nem azüngtsü aser zülutsü sayuba oshi ya tanga kecha ochia masü saka Ao oshi liasü. Aji oda, asenoki kodang item tatalokbatemji bilemdangdir, oshisa asüyonga Ao oshi nung tashi aser ain balaka aketba asenoki angur. Ajangla, iba ama oshiji kodaser asenoki amadoktsü ? Aser iba ama tangar dena nüchi kümstüba aser yimjung yanglutsüba oshi agi nümamedangi bilemtsü ? Ajisüaka, item maongka aser temoatsütemji amadoker, mapang kabo asenoki English tera jembitetba agi anüng petinu atong ama bilem aser pei tetsü oshi jembitsüba mashimalu mapa ka amato aküm. Ibaji takartsür ka agishi nung pei tetsü sentokba amai ka liasü. Ajisüaka, English ashiba agi English nung mekümtet, anungji Aotsür aser Aorsang to English-a junga mashi aser Ao oshia junga mejembitet ta tom nung tagidak maka küma aoba Aotsür Aortem aika lir. Aji oda, tanübo item ajakji rajema tangatetba ka dangi arua tashitemeteter alidak Kohima nung Ao oshi asentenshitsü tenzüka ya Aor ajak asoshi temoatsü mapang ka tenzüker asütsü. Ajisüaka, Aotsür Aor ajaki Ao jembitettsüa asentenshi adoktsüba tang ama benjong mapang lokti nung ajungshiteper senshiba kisüng agibo mataloktsü saka Ao oshi asentenshitsüba kibong nungi tenzüksüla. Aji oda, nisung taküm ka lia aotsüba sobaliba tajung aser oshi angazüksüba school tajungtibaji kibong ya lir. Aji meteta kibong nung tsüraburtemi anir Ao oshi jembitsüla, Ao ken külemi atentsüla aser Ao agi külemi sarasademtsüla, kechiyong pei kidang pei tetsü oshi mejembira aser mangazükra, tanga tesem nungbo Ao oshi jembidak aser angazükdak makatsü. Aji oda, oshi ka angazüksüba jembiba, angaba aser azüngba nungi angazüksü, anungji Ao oshi jembitettsü aser zülutetsü atema nisung shiai anogo nung khenbo Ao Laishiba aser Ao oshi nung adokba Osangkaket azüngtsüla. Ano, kokra English aser Ao Laishiba na külemi yur medemdanga züngra, iba jagi English nunga aser Ao oshi nunga kanga tashi itta akümstü. Aji oda, Ao oshi wazüka ayutsü jembibaji, jembir dang ayutsüba masü saka mapa küma inyaksü asoshi nisung shiai mera talila kabo aotsüla. Iba meraji kidanga, yimdong nunga aser mapa inyakdaka akok tashi Aortem denbo Ao agi jembitsü aser Ao agi adokba kaketter azüngtsü atema yimya sübatsü merangba mapa asütsüa akok. Aji oda, tanü asüngbo mobile phone nung dang osang bentepa zülutep asünungji sms aser whatsapp ajanga osang yokdanga Ao oshi nung dang zülutepa, iba jagi memeteti Ao oshi jembiba nung tuluka renloker alitsü. Asenoki asen tetsü oshi wazüka yuner saka meyuteter ta asübaji asenoki jangraba ama mapa küma meinyaktetba ajanga lir. Oshi yabo jembiba agi wazüka yuteter, anungji jembitsüla, zülutsüla aser azüngtsüla. Atangji, asenok ka küma longjemtsü jembiyonga yimten nung telok ka küma melongjemtettsü, kechiyong kodaser Aor ajunga yimten telok ka nung dang adentsü ? Tamangba yimsü nunga tesayuba ka kübok melongjemtettsü, kechiyong tamangba yabo manguba dak amangba mapa ka lir. Ajisüaka, kin ka küma longjemtsüba jibo pei tetsü oshi ya dang lir. Oshi kasa jembiba agi melamelaa angatetteper aser kasa oshi jembirtemji kinunger kümadoker. Iba tangatetba nung tanü asenoki asen tetsü oshi wazüka ayutsü jembiba yagi, atangji, asen kin mesamai kümzüksü.

OLEMSABANG

TSÜNGREMI MEZÜJA SHIMTETBA AO KIN!

~ Dr. R Zulu Jamir, Kumlong Baptist Arogo, Mokokchung

Naga nung rongnung asen Ao kinji soja sor nokinketer sotetdak mongjen lir. Lim tekong - tenem, tarok - lenten, aser alijak ajunga ramoka yimsü asütsüa teyangluribo yimli tulu asen Aor nem agütsü. Saka kodasür Ao lima ya tashi ang aküm? Alima nung meimchir tapu aika liaka Tsüngremi Israel chirtem dak sakloka pei agitsü techir ka ama mezüja shimtet, saka Israel nüburtemi Tsüngremi mulungba ama mejaja nung, Egypt nung tsükchir tesashi ket nung küm noklang pezü tashi alar süa alitsü bendanga agütsü. Tanü asen Aortema Naga kin rongnung samanir ama, pi kintem asoshi nükrangtong asütsü shimtet. Aorji pi kin asoshi anüng petinu ama kangasa wangshia Teyangluribo moatsüogo. Mapang ka Aorji tamangbaren nungi tenzüker; Yimden yimli, Sorkar wadang, aser lokti ajunga nung teben masü, teküboklen masü, saka tokolak süa aruogo ni! Teyanglur Tsüngremi Israel chirtem dang ashi ama, "Kibubai na teben masü tokolak kümdaksütsü; aser na teküboklen masü, temalen dang alitsü; nai dang Kibuba ne Tsüngremi temelaba koba tanü ni ne nem agütsüdar, aji kümdanga benshira." T. Kunem 28:13.

Temeim Ao senso tajungtem, asenok koma tenzüker? Koma merena aru? Aser tanü kechi jenjang nung lir? Ajaki khen süoki ia bilemdangdi! Temeim Ao kin, Tsüngrem O ajanga maneni asenok den jembir! "Nenoki jenti imla saka ajiang, aji tera dang liasü; aser aji nenoki kidangi bener aru, aser aji ni aputokatok. Kechiba? ta Temeranger Kibubai ashir. Kechiaser nenok nisung shia pei ki asoshi mazügi inyakdang kü kibo teraksa nung lir. Anungji nenok madak anüngi pei azüngtsü sota lir aser alimai pei tejang sota lir." Hagai 1:9-10. Tanü Tsüngremi asenok nem lezmüksüba temoatsü magitettsüa kechi agi sota lir, mesüra akhi temoatsü to kong sentoka ali? Aor ajaki khen arok-aroka bilemdangtsü nüngdaker! Atangji asen Ao kinji lipok dang nungi Naga kin ajunga madak yimsü asütsü Tsüngremi khuret ka ama, maongka ka ama, aser temoatsü ka ama, Tsüngremi asen Aor dak temulung lemtetba ya tulu ka liasü. Ni amanger Tsüngremi asenok shimtetba ya pei tejangraba ataloktsü atema masü, saka tanüngba Naga kin ajunga asoshi amang nung tesangwa milen ka ama, Tanela rongnir asütsü, shisaliok nung lensar asütsü, shimang asoshi taneptsü angudak tesem, Sobaliba arangshidak, aser rongsenketzung moludak tesem ka asütsü Teyangluribo shimteta toktsü. Tanü ama alima kanga kara melenshia tejakleni aoba putu ka nung asen lima ya joko alima kinük pezü sü den sentaktepa renloka aoba alima tiyongtsü ka kümer alitsüba sürnung ta nemjemseta bilemer!

Süra kechi ajanga tanü asen Ao lima ya tashi ang aküm? Lenmang nungi tenzüker, health care, education, business aser establishment tongtibang kata amenteta malibaji asen lima ya ka asütsü ta bilemer! Kechi timtem ajanga alima yamai raksatet? Leniri anir, shisashir, Tsüngrem nisungtem, nütsüng nübur tila-tulu ajungai khen taroktibai ia bilemdangtsü rongdak nüngdak. Shiruru tila ka ali telung nung aliba koba dang 'Kilep' ta ajar, iba shiruru shiji kangasa tako ta jembir. Kechiba? Kilep-i asütsü mapang pa shi miima toktsür asür ta tsürabur otsü nung jembir. Iba medem asen Aor tejakleni renloka moutetba ya pi tsüchirtemi razükratema raksatsüba ka masü, saka asen Aor o Aor na kadi ka arishitepba, tenük merem aser Mokokaji den teyanglur Tsüngrem sentokba ajanga lir.

Yakob 3:14-16 nung ashir, "Saka nenok temulung nung tako aser Mokokaji aser telemsa lira. Ochi anema tiak tesang aser tiyazü tejembi. Iba shisatsü temaba nungi aluba masü, saka alima, shi aser mojingi agütsüba. Kechiyong kechi nung Mokokaji aser telemsa lir, Idakji rarabangsen aser mapa tamajung ajak lir." Putu ishika asen Ao kin asoshi tashimait aser tetsükdaksü tulutibaji iba Lai o ajanga tutettsüogo. Anungji kechi nung asenok tsüka lir, Tsüngremi tenüng nung tera tena rakteta intokdi. II Putipuyang 7:14 nung yamai ashir, "kü nübur shirnok kü tenüng agi ja-a lir parnok sasa ajemaludi süra, aser sarasademra, aser kü tejak bushira, aser parnok lenmang tamajung nungi meyipra, idangji ni kotak nungi angashitsü, aser parnok temenen atoktsü, aser parnok lima aneptsütsü." Asen Aori dang ajemalua Tsüngremi tsüngdangi arura ajak takoktsü kümdaksütsü. Isaia 61:3-4 nung ashiba ama, "Zion nung mangyimertem asoshi anepalutsütsü, parnok nem aut melena narozük agütsütsü, mangyimba melena tepelatsü totzü, zürep aliba tanela melena tenüngsang sobutsü agütsütsü, oda pa sentsüwangshi atema parnok dang temeshi süngdong Kibubai atemba ta ajatsü asoshi, pai ni yok. Parnoki akhidang raksabattem yanglushitsü, alemli azüngazünga toktsüba, putu aika sentokatokba, aser intoka aliba yimtem parnoki yanglushitsü." Asen Aor kangasa ajungketa merenba nükmen ya Tsüngremi dak tenzüka lir. Iba yongji Tsüngremi asenok kanga moatsüogo. Ano tanü iba putu nunga asenoki iba nükmen dangisa meyper: tanela nung süshia, temeim nung süshia, amalitep nung süshia, aser Tsüngremi den tezüngzüktep ayuba nung süshia, kodang Aor item atep akangshidir, atangji Tsüngremi asenok nem aut melena narozük agütsütsü.

Tatem nung Kol. 3:14 nung yamai ashir, "aser item ajak dak alema temeim kobai kechisarena tetemjen telungjem nung alentepe yutsür iba temeimji sobuang." Asen kini dang kadi ka nem tatok agütsüteper, temeim nung ka küma lungjemer Tsüngremi aniokra, asen lima nung anü tasen ka adoktsü aser iba sangwaji tulu ka alitsü. Tsüngremi Pa agitsü shimtetba Ao kin maneni moajang.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Assam Valley Baptist Asso. 20buba Foundation Day among



July 31, 2025 nü Jorhat district kübok Nakachari nung Assam Valley Baptist Association (AVBA) 20buba Foundation Day sentong nung (nokdaka alirtem abelen nungi) Aamong Phukan, Secy-Youth Department, Asenla Ao, Mission Coordinator cum Treasurer, Atua Munda, Touring Evangelist, Sanjay Pantati, Secretary, Mr. Nimrudh Mandal, Secy-Church & Mission aser Huni Gogoi, Executive Secretary nunger noksa nung angur.

Nakachari (Jorhat), Luroi/ August 01 (TYO): July 31, 2025 nü Jorhat district kübok Nakachari nung Assam Valley Baptist Association (AVBA)-i 20buba Foundation Day mongogo. Kasa anogomong sentong nung Rev. C. Temjen-i AVBA office ketdangpur tassenpurtem nem mapa nunglokja parnok asoshi sarasademtsü aser Dimapur Ao Baptist Arogo nung Mission Director, Jongshimanen Jamir-i Tsüngrem O jembia liasü. Kasa sentong nung Nakachari Ao Baptist Arogo nung pastor Limaakum-ia o tatsüka jembia aser Er. Sashi Longchar-i Süngratsü Lipong Semchir Mission-i AVBA den Iba sentong nung Arogo 34 nungi nisung 200 shi aden.

Pastor kati Trump dang bendanger Khristantem kümzüktsü mepishi

August 01, 2025: Evangelical Pastor, Ara Torosian-i US Tir, Donald Trump dang US nung bendanger Khristantem kümzüktsü mepishiba den külemi White House kima anogo asemnü tashi sarasadema liasü. Torosian ya Los Angeles nung aliba Cornerstone Church nung pastor lir. Tamalen pa-a Iran nung küm ana dak tali tepuokdak liasü, ajisüaka küm ter tejaklen pa US-i jena aru aser tangbo pa ya US senso ka lir. Torosian-i, "Iba linük nung mezüng ni chichiba tamangba yimsü temeden ajangshia liasü, aser iba atemaji ni nüma atanger aser senso ka ama pelar," ta pai Los Angeles Times osangkaket nung ocet ka ajanga metetdaksü. Ajisüaka taküm June ita nung federal immigration ketdangsertemi par Arogo nung züngsem Iran nunger pongu apuba ajanga pa kanga aoksaa liasü. Iran nunger Khristantemji tanaben Iran linüki meyipa yokra parnok tepsettsüa akok, ta pai tsübuu bilemetsür. "America ya iba dang nungi tajungba, ta ni bilemer. Tawa tatalokba ya ajanga ni Iran nung timtem ajangshiba sülen Iran toktsür ajenba imdangi arua bilemteter. Ajisüaka America nunger teimbakati iba ya pu-masemer aser evangelical Khristantemia pu-masemer ta ni amanger. Evangelical Khristantem aikati Trump nem vote agütsü, kechiyong pai bendangertem meyipa yoktsü atema masü saka reshikangshi ajangshiba Khristantem kümzüktsü, ta nangzüka liasü," ta Torosian-i ashi. Taoba hopta Torosian-i Washington-i oa White House kima Lafayette Park nung tang pua alirtem atema anogo asemnü tashi lumia sarasademtsüogo. Paisa Evangelical refugee advocacy organization World Relief teyari ajanga yimsüsürtem aika ajuruteta jembio. "Ozü Arogo nung züngsemtem dak atalokba aser Iran nunger Khristan refugee tem timtem indang ni ashidang parnoki angaa ataba atema ni pelar," ta pai Instagram nung video ka ajanga metetdaksü. Torisian-i, "June ita nung apuba apuani naji US nung alitsü aser mapa inyaksü atema temelaba ngur liasü. Tenati Torisian Arogo nung baptia Khristan yimsü agizüka liasü. Tenati US nung jenoktsü atema temepishiba agütsüba ken oji taküm September ita nung angadangtsü," ta metetdaksü. Iran nunger apuani naji 'CBP One' process ajanga US telungi ait, ajisüaka tena maneni US nung alitsü atema temelaba mali, ta federal agents-i metetdakja liasü. Taoba ita Pastor-i, "Apuani na ket nungji Social Security numbers aser mapa inyaksü atema temelaba agütsüba permits lir, tenati ozüng alema inyaka mali aser küm ka tejaklen nungi tenaprongla ozü Arogo nung adener. Ozü Arogo nung züngsemtem apubaji tejashitsüka liasü. Ni atema dang masü saka Arogo züngsem ajak atema tejashitsüka lir. Ni Tehran (Iran yimtiba) nung akhidang atalokba ang bilemteta liasü. Parnok taküm sadoksadoka alitsü atema yagi aru," ta metetdakja liasü. Torosian-i, Marjan aser la kinüngbu naji Khristan asüba agi Iran toktsür jena aru aser tena yangi Los Angeles nung kinüngertem mali. Tena ya yangi tejenokdak bushirtem lir. Tena ya CBP One inyakyim ajanga US-i aru, ta metetdaksü. Donald Trump-i office mapa agizükba sülen U.S. Department of Homeland Security dang CBP One app ajanga linük telungi aittsü temelaba agüja alirtem linük nungi meindoktsü tuyua liasü. Iba app ajanga nisung 985,000 shi US telungi aitogo. Billy Graham Evangelistic Association nung Tir aser sayutsüngir, Franklin Graham-ia Washington nung lenirtem ajurua bendanger Afghanistan nunger tebilemetsü khuret lemsatepogo. Iran nung reshikangshi ajanga US nung jenoka alir aika US nungi meindokogo aser parnok rongnung US nungi Panama-i meindokba nisung 11 densema lir.

ANOGO ABEN TSÜNGREM DEN

Shibai parnok idakji yutsü ? (T.Ken 75:1-10)

Kodang nüburtemi peisasa temaba atur aser mezüngbuba asütsü meranger, tekong 7 ji azüngtsü junger: "Saka Tsüngremji o bendanger. Pai ka ludaktsür, ka tudaktsür." Iba yagi asenok asükümba arütsür. Nüburtem kechi jenjang nung lir parnok idakji alitsü shibai mela? Tsüngremi Yohan Baptitsübai ashi, "Kotak nungi nisung nem kechi agütsür iba dak alema, pai kecha angutsü makok" (Yn. 3:27). Peteri zülu, "Anungji mapang tetemsü nung nenok uludaktsütsü asoshi, nenoki nenok sasa tashi taitba teka kübok ajemalua kümang" (1Peter 5:6). Shibai tanishirtemi temaba jenjang nung ulutsür? Tsüngremi. Shibai temeba menden nungi teküpbokbai uludaktsür? Tsüngremi. Ibai inyaksü shiba shisa aka? Tsüngrem. Pa kechi jenjang nung lir aji Tsüngremi pa idakji nüngdaker ta shingai mebilemetsüla. Asenok kong lir idakji lir, kechiaser Tsüngremi asenok idakji yutsü ta asenoki angatetdi. Tekong 7 jagi asenok asükümba dang arutsür masü- iba yagi aremzüktsü ajungshir. Yosef taküm bilemdangang, pa tsükchirtem ludaktsütsü aser pa kechi nung alitsü tim ataa ali. Mosa aser Nehemiah indang bilemdangang. Asenok taremzük koda nüngdak! Ken ken Tsüngremi pa nübur taochi makaba yimsüsür kübok yutsür. Asenoki mulungba raksatsü asoshi Tejen Lai nung ama, Tsüngremi mapang tamajung ajanga odaktsür aser asenok tali pa mesüka kümdaktsür. Tasembuba, iba yagi asenok taküm nung shisa bulu pungpadaktsür. Na tanishir menden nung lir asü? Tsüngremi na idakji yutsü. Tsüngremi na idakji yutsü nungji Pai mulungba tashi na idakji alitsü. Pai shimtetba leman nung Tsüngremi na amshitsü. Asüküm masütsü kümdangang. Kodang asenoki asükümdir aser mezümekümdir, Tsüngremi ashir, "Ibai na alutsü mapang lir." Saka asenoki asen tila kümra, Tsüngremi ulutsütsü. Pa tekai asenok ajungkettsü. "Tsüngremi asükümer nokdanger, saka ajemalur nem taochi agütsür" (1 Peter 5:5). Tanishir tajung kübok na mapa inyakdak mesüra arogo nung timtema alir asü? Tangari telemtetba tamajung agiba agi parnok idakji yutsü asü? Ne khuret ajak Tsüngrem dangi bener arung aser itemji lemsatepang. Maneni aotsü Pa dang tashi asüngdangang aser Pai obendangtsü ta bilemtettang. Institute of Christian Leadership Training 11buba Convocation agiogo **Dimapur, August 01 (TYO):** dang nungi khuret ano tuluba July 31, 2025 nü Mission lir," ta ashi. Centre Tening nung Liangmai Kibuba tenzüktsü atema Baptist Association (LBA) nenoki arrtsü adenogo, anungji kübok Institute of Christian Leadership Training 11buba wadang tenzüktsüla, ta pai Convocation sentong ayongzük. Graduate asüba anogo ya asürtem nem tenüngsang agüja parnok dang, iba ya Kibuba tajaba anener masü, Iba sentong nung tongti o jembirji LBA Mens' tenzüktsü atema tang Department nung Secretary, tetenzüker dang, ta ashi. Rev. N. K. Joseph liasü. "Kibuba tenzükba wadang Graduate asüba anogo ya nung teti dangbo sademsadema tepela, takok anguba aser malitsü, ajisüaka mapang kaka imlaba anogo ka lir, ta shia nungbo nai tetsükdaktsü Rev. Joseph-i graduate asür ajurutsü, tezüdang alutsü student ter dang, "Nenoki sarasadema azüngba ajanga akok, ajisüaka mapang ajak iba jenjang tongtetogo. nung Tsüngrem tenzüktsüla," ta Ajisüaka takok ngua pelaba paisa ayongzük.

AO OSHI ANGAZÜKDAK:**TANÜ ANGAZÜKTSÜBA OJANG****Tesanem**

(n) temenemtsü tajung (scent)

* Aon tesanem tajung agi chiyongnua kümdaktsür.

Tesangra

(adj) shisa taka, kanga terajem (mentally sharp)

* Tesangra tetsüri tebur azüokteter.

**OLONG PAITEP # 7226**

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

1. Nisung jenti
4. Tsük rudenba
6. Temzüng tesashi
8. S___i
9. Nisung rongnung telemsa
10. Anogoshi
12. Ajanga aor
13. Tsük rizüngdak
14. Tebang nungi adokba
16. Süngdong tatembangtiba
17. Meputep

- (5)

- (5)

- (5)

- (3)

- (3)

- (4)

- (4)

- (3)

- (3)

- (5)

- (5)

LANGTSÜNGLEN

1. Tenük telong
2. Committee dang ajar
3. Yagi ki okdoker
5. Yim lenmang
7. Temoatsü keter meyipa aruba
11. Kanga junga menemba
12. Kenyongi majinü
13. Rong kanga tulu

- (9)

- (5)

- (7)

- (5)

- (9)

- (7)

- (5)

- (5)

OLONG PAITEP # 7225 TELANGZÜBA**TIPIEN :**

1. Kasa, 6. Rangben, 7. Mait,
9. Poktet, 11. Ati, 13. Atasa,
16. Sür, 17. Rajang, 20. Lanu,
24. Nüngjem, 25. Süra.

LANGTSÜNGLEN :

1. Khu, 2. Süjak, 3. Onük, 4. Oba,
5. Anü, 6. Ratet, 7. Mozü, 8. Ita,
10. Tar, 12. Tinu, 14. Salem,
15. Aja, 18. Anünü, 19. Taju,
21. Ano, 22. Onü, 23. Pua.

NAI-A YA METETTER MA

Toyota Kirloskar Motor-i 2025 küm july ita unit 32,575 ayok

Bengaluru, Luroi/August 1 (Agencies): Toyota Kirloskar Motor (TKM)-i tanü sangdong ka ajanga 2025 küm July ita units 32,575 yoka shilem 3 renlokba metetdaksüogo. Nüburtemi onok kanga junga agizüka arudar, aser iba ajanga onoki customer dak rangloker inyakba sayur. Jenjang aketba osettem agüja onoki maneni market tenzüksü aser value-added services ajungketshitsü, koba taruba itatem nung terenlok atema tongtibang asütsü, ta TKM-i ashi.

Toyota Glanza aser Urban Cruiser atema Hyryder exclusive Limited Edition Prestige Packages tem kanga junga agizükogo. Innova HyCross nema Bharat NCAP-i 5-star safety rating agütsüogo. Toyota Glanza variants ajak nung airbag trok agütsüba ajanga gari anir aser tamener ajak kümzüka toktsür.

Modi aser Shah nati Assam nung project balala lapoktsütsü

Union Home Minister Amit Shah August 29 nü Guwahati-i arua Khanapara nung Assam Panchayat Conference lapoktsüba sülen iba sentong nung shilem agitsü.

Guwahati, Luroi/August 1 (Agencies): Union Home Minister Amit Shah aser Ato Kilonser Narendra Modi nati August 29 aser September 8 nü Assam nung terenlok maparen balala lapoktsütsü atema semdangtsü.

Assam Chief Minister Himanta Biswa Sarma-i Hokolbarnü ashiba agi, Modi-Shah nati Asam nung terenlok putu tasen ka tenzüksütsü atema semdangtsü.

X nung post ka ajanga Chief Minister Himanta Biswa Sarma-i, "Assam nung aliba nüburtem September 8 nü Ato Kilonser @narendramodi aser August 29 nü Union Home Minister @AmitShah na Assam nung aliba nüburtem nem project balala bendang agütsü arutsü aliba yongyasetar, ta ashi.

Union Home Minister Amit Shah ya August 29 nü Guwahati

atongtsü aser Khanapara nung Assam Panchayat Conference nung shilem agitsü. Pai Zilla Parishads, Anchalik Panchayats, aser Gaon Panchayats nung tawa shimba züngsemtem den sensak asemstsü.

Paisa, tetsür, tanur aser tekübokba jenjang nung aliba nüburtem tajungba tenzüksü atema benokba criminal justice legislation tasenba lepa reprangshitsü imlar.

Kasa mapang nung Ato Kilonser Narendra Modi September 8 nü Assam-i arutsü. Pai India nunger mezüngbuba Golaghat district kübok Numaligarh nung bamboo-based bio-ethanol refinery ka lapoktsütsü, koba sen crore 4,000 intoka yangluogo.

Iba flagship green energy project ya Assam renewable fuel hub ka kümdaktsütsü nükjisong nung amenokogo aser

iba ajanga mapa meyirejang aika adokdaksütsü aser au tsünertem aser arem nung aliba lokti ajangzükdaksütsü.

Assam lenla ajak nung kanga renloka aoba mapang ka nung tang lenirtemi state semdangtsü lir. Cabinet-i tawa petrochemicals, electric vehicle components, cement, plastic recycling, aser hospitality amala sector tem nung sen crore 7,700 intoktsü agizükgo, aser iba ajanga taruba küm ishika tsüngda mapang 16,000 dak tema adokdaksütsü imlar.

Healthcare aser education dak sendakba nung Mangaldai Medical College aser Kanaklata Barua University densema taruba centres of excellence tem ajanga health dak sendakba nung Assam jenjang tajungba kümdaktsütsü aser Assam ya tech-driven education aser innovation hub ka kümdaktsütsü.

BSF ketdangsür kati Manipur semdang

Imphal, Luroi/August 1 (Agencies): Additional Director General, Border Security Force (ADG, BSF) Mahesh Kumar Aggarwal-i Hokolbarnü Manipur semdanga tang security dak sendakba nung tensa asadanga den BSF, Assam Rifles, aser Indian Army unit tem koda renema ali aji asadanga liasü.

ADG-i Manipur semdanga ajanga, mepetmesü adoker aliba state nung yimjung bener arutsü aser state lenla ajak nung renloka odaktsütsü atema BSF bendanga agütsür aliba sayur.

Manipur semdanga mapang ADG, BSF nem state nung tensa azüoktsü atema tang jenjang balala agia aliba indang metetdaksü.

Paisa, tensa balala atema sepaitem koda renema ali aji asadang aser parnok professionalism, taremzüker aser tetsükdaktsü balala koktetyonga aotsü atema parnok bendanga agütsür aliba atema tenüngsang agüja liasü.

Iba sülen Mahesh Kumar Aggarwal-i, Inspector General, Border Security Force, Mizoram and Cachar Frontier

Ravi Kant den külemi Raj Bhavan, Imphal nung Manipur Angh Ajay Kumar Bhalla ajurua liasü.

Senden nung ketdangsürtemi arrtsü nung security indang, iba tesem nung BSF renema aliba indang aser yimjung bener arutsü atema tang jenjang balala agia aliba indang Angh nem metetdaksü.

Parnokisa state agency tem den sendaktepa inyakba indang lemsatepba den state nung yimjung benoktsü atema parnok bendanga agütsür aliba nenshia metetdaksü.

Mizoram nung sen crore 33.33 alang meth tablets apu

Aizawl, Luroi/August 1 (Agencies): Assam Rifles-i Brehostibarnü Mizoram nung Champhai district kübok Zote tesem temeket meita aoba mapang methamphetamine tablets seret 11 dak tema ngutetogo.

Itangitertem nungi osang tejangja angazükba sülen iba meita aoba sentong ya benoka liasü. Assam Rifles-i pua aliba temesepba mozü ya

international shishilembadak sen crore 33.33 alang asütsü ta asatetogo.

Ken o maneni bushisüngdangtsü aser temzüng ozüng dak ajemdaker jenjang tapet agitsü atema AR-i apuba temesepba mozü ya Champhai Excise and Narcotics Department nem bendanga agütsüogo.

Hopta ka tsüngda iba tesem nung tang agi tanabenbuba

ozüng alema oset balala shibelenba puogo. July 24 nü Assam Rifles-i Awangkhum, Manipur nung National Highway-37 anasa yi case 1,430 pua liasü.

Parnoki bottle aser can nung zür aliba yi 32,000 puogo, koba shishilembadak crore 1 shi asütsü. Iba dak sendakba nung sepaitemi nisung ana apu aser local police nem bendanga agütsüogo.

GOVERNMENT OF NAGALAND

DIRECTORATE OF EMPLOYMENT, SKILL DEVELOPMENT & ENTREPRENEURSHIP

NAGALAND: KOHIMA

NO.DET-2/14/2001/PT-III/

Dated Kohima, the August 2025

RE-ADVERTISEMENT

In continuation to Advertisement of even numberdated 23/05/2025, seats are still available in the following Govt. ITIs. In this regard,eligible candidates may contact Principal/Officer-in-charge of the concerned Govt. ITI for selection/ admission along with relevant documents on first come first serve basis, from 4th August, 2025 to 30th August, 2025Further, candidates who are not selected in the recently concluded Entrance Test, if interested may also apply in other ITIs in their preferred trade where seats are available.

Note:

1. The Educational Qualification for Mechanic Motor Vehicle trade under SCVT is relaxed to class 8th pass.

2. All other conditions remain the same as advertised earlier.

SESSION: 2025-2026/27

Sl. No	Trades	Duration of Course	Minimum Educational Qualification	Name of Govt. ITIs	
A. Engineering Trades				*NCVET	**SCVT
1.	Wood Work Technician (Carpenter)	1 year	8 th Passed	Mon. Phek, Wokha, Tuensang, Kiphire	
2.	Plumber	1 year	8 th Passed	Kohima	Phek, Zunheboto.
3.	Mason (Building Constructor)	1 year	8 th Passed	Kohima.	
4.	Mechanic Diesel	1 year	10 th Passed with Math & Science for NCVT & 8 th Passed for SCVT	Kohima.	Tuensang
5.	Fitter	2 years	10 th Passed with Math & Science	Kohima	-
6.	Draughtsman(Civil)	2 years	10 th Passed with Math & Science	Mokokchung	-
7.	Mechanic Motor Vehicle	1 year	8 th Passed	-	Mokokchung, Mon, Phek
B. Non- Engineering Trades.				*NCVET	*SCVT
1.	Cosmetology (Hair & Skin Care)	1 year	10 th Passed	Kohima	, Phek, Chümoukedima.
2.	Computer Operator & Programming Assistant(COPA)	1 year	10 th Passed	Kohima, Zunheboto, Mon,	Wokha, Chümoukedima.
3.	Knitting	1 year	8 th Passed	-	Kohima, Mon.
4.	Sewing Technology (Cutting & Sewing)	1 year	8 th Passed	Mon, Chümoukedima. Kiphire.	Tuensang, Wokha, Phek , Zunheboto.
5.	Stenographer Secretarial Assistant	1 year	10 th Passed	-	Chümoukedima, Mokokchung.

* NCVET- National Council for Vocational Education and Training (Under Central Govt.)

** SCVT- State Council for Vocational Training (Under State Govt.)

Sd/-

SAVIO VISA

Director

GOVERNMENT OF NAGALAND

DIRECTORATE OF TECHNICAL EDUCATION

NAGALAND : KOHIMA - 797004

NO.DTE/CSAB.NEUT/1/2025

Kohima, dated the 1stAugust 2025.

Notification on CSAB-NEUT: 2025 Spot Round Counselling

This is to inform all the JEE (MAIN)-2025 appeared candidates that the Spot and final round counselling for CSAB-NEUT: 2025 is scheduled on the 8thAugust, 2025 at 1:00 PM in the Conference Hall of Directorate of Technical Education, below Nagaland Secretariate, Kohima against the programas indicated below. Interested candidates with valid JEE (MAIN)-2025 score are informed to submit application form to the office of the undersigned on or before 12:00 Noon, the 8thAugust, 2025. Documents required : ST, Indigenous Certificate, PRC, DoB Certificate, HSSLC mark sheet, JEE admit card, JEE score card, Medical Certificate format as per CSAB-NEUT, 3nos of recent passport photographs, BT Certificate and one ID Proof (either PAN Card/ Aadhaar Card.

Candidates who have withdrawn their allotted seats in round 1 & 2 as per CSAB-NEUT 2025 schedule are also eligible to participate on the Spot Round counselling. Candidates who did not register for round 1 & 2 are also eligible to participate. The candidates have to pay the seat allotment/ acceptance fee of Rs. 5000/- (Rupees Five Thousand) only in cash, in the event he/she is selected in the Spot round Counselling as per CSAB-NEUT rule.

Application form will be made available in the office of the undersignedfrom 4th August 2025.

Sl. No	STREAM	PROGRAM
1	BE/B.Tech	Civil Engineering
2	BE/B.Tech	Chemical Engineering
3	BE/B.Tech	Computer S/T/E/S&E
4	BE/B.Tech	Computer Science & Engineering
5	BE/B.Tech	Electrical Engineering
6	BE/B.Tech	Electrical & Electronics
7	BE/B.Tech	Electronics & Telecommunication
8	BE/B.Tech	Mechanical Engineering
9	B.Pharm	Pharmacy

(Er. VipulhouLhoungu)

Director

Russia-i Ukraine amak; tanur pongu densemanisung 31 tepset Kyiv, Luroi/August 01 (Agencies): Russia-i Ukraine yimtiba nung drone aser missile amshia amakba nung tanur pongu densema nisung 31 tepseta aser ano nisung 150 dak tema yirutsür anogo ka lir Hokulbarnü Kyiv nung mangyimba anogo amung, ta ketdangsür temi ashì. Brehostibarnü amakba nung asürtem rongnung tanubotisang ya arishi küm ana liasü aser yirurtem rongnung tanur 16 lir, ta Ukraine Tir Volodymyr Zelenskyy-i ashì. 2022 küm October ita nungi tenzüka Kyiv yimti nung anünglen nungi makyonga aruba nung khen amakdang tanur timtìba asübaji ibai alitsü. Emergency crews temi ki o jen raksar aliba maneni akaker aser Hokulbarnep tashinung asür timba akum. Russia-i amakba mapang yimti nung nisung aliba story toku ki ka tuluba raksatsü, aser nisung aliba ki, schools, kindergartens, medical facilities aser universities densema danga ki 100 dak tema raksatsü, ta ketdangsür temi ashir. US Tir Donald Trump densema anüolen linük lenirtemi civilian aliba tesem nung amakba anentsü ayongzüakaka Russia-i Ukraine yimti balala nung amakba tali akumer. Russian sepaitemi 1,000-kilometer (620-mile) front line nunga tanen makai amaker, kong tesüiba küm tesem aika parnoki atsüngdoktetaka linük anatsülen sepai meyirijang dak tema süogo. July ita Russia-i Ukraine dak glide bombs 5,100 dak tema, Shahed drones 3,800 dak tema, ballistic missiles 128 densema missiles tabu balala 260 jungnü amshia amak, ta Zelenskyy-i ashir. Pai linük balala dang Russia nem rongsenketzüng tsütsü tenokdangba/temerenshi tesashiba agütsütsü maneni akhanger. "Kremlin-i komarka (sanctions ajanga) tetsükdakba mali ashiyonga, parnok dak kongshir aser tesashiba asütsüla," ta Zelenskyy-i ashì. Pai Hokulbarnü iba o ashiba ya Brehostibarnü Trump-i, "US-i Russia nem tenokdangba tali agütsütsü sentong lir, saka item tenokdangba ajanga pa (Russia Tir Vladimir Putin) nem tetsükdaktsü agütsür asü masüar ni memetet," ta ashiba nung langzür amai angateter. Kasa mapang linük anüdoklen Donetsk region kübok tenem kolak nung aliba Chasiv Yar yimti nung Ukraine sepatem anisüngzük mangur, kong ita 18 shi raraba sülen Russia-i Ukraine defenses raksatsütsü meranger.

Gaza nung chiyongtsü alemba reprangtsü US envoy Israel tongogo

Jerusalem, Luroi/August 01 (Agencies): Palestine nunger chiyongtsü aser danga teyari oset atartem asüba tali akumba mapang Gaza nung humanitarian tensa tamajungba akumba indang jembishinütsü asoshi US Tir Donald Trump indang special envoy Steve Witkoff Brehostibarnü Israel tongogo. Witkoff aser U.S. Ambassador Mike Huckabee nati Hokulbarnü Gaza nung chiyongtsü alemba tesemtem semdangtsü, ta White House-i ashì. Tesüiba ghonda 24 tsüngta teyari agütsü merangba mapang Palestine nunger nisung 91 tepset aser 600 dak tema yiru, ta Gaza Health Ministry ajanga Brehostibarnü ashì. Asürtem rongnung nisung 54 Gaza north len Zikim crossing anasa Bodhbarnü chiyongtsü ataa aliba mapang tepset, ta ministry ajanga ashì. Asürtem ya timba akumtsü imlar, kechiaser tepseter mesüra yirur alirtem ya timba Gaza north tsütsü kanga bulua mamshiba, nüngdakba oset peria maliba mozüki temi anir aru aser ano mezüngdang. Israel indang mitkar temi ashiba agi, Palestine nungeri aid trucks tem lungbang aser Israel mitkar temi telok nung tekumdangtsü injang khaloktsü, saka Israel nungeri injang khaloktsüba ajanga yiruba indangbo memetet. Brehostibarnü Gaza tiyonglen Zawaida yimti nung anünglen nungi chiyongtsü tsükdaktsüba tsütsüi Palestine nunger asemtepa aodang rongrong adoka liasü. Teyari agütsür temi anünglen nungi ang chiyongtsü agütsür, kechiaser Gaza Strip telungi arütsü alema aiba shibanga lir. Anünglen nungi chiyongtsü yokba ajanga nisung ajemsetba aser atsüka atar rakzükbali akumer aser yasa-tzüra aliba nisungtem asatepa parcels agi rakteper. Anünglen nungi tsükdakjaka Gaza telungi teyari osettem aiba ya kanga ajema lir, kong anogoshia trucks 500 nungi 600 tashi nüngdaker, ta teyari agütsüba lokti tentet temi ashir. Gaza nung humanitarian aid ketdangsüa agütsüba Iseael defense ajanga ashiba agi, Bodhbarnü Gaza telungi teyari oset bener trucks 270 yokogo aser anünglen nungi teyari oset pallets 32 tsükdaktsüogo. Linük balalai kanga ajungshiba mechi Gaza telungi international aid tali yoktsü asoshi hopta tatemlen Israel-i mera aika sangdonga lir. Gaza nung nüburtem tia tamajungba akumba mechi linük balalai Israel kanga aitsür. German Foreign Minister Johann Wadephul anogo ana atema Brehostibarnü Israel tongogo aser iba mapang pai Israel-i amokbanga aliba West Bank semdangtsü. Germany ya akhi mapang nungi Israel tembar tajung ka lir, saka tangbo Israel-i Gaza nung inyaksangshi aitsür. Parnoki Israel dang teyari oset tali kumdaktsütsü mechi tali inyaktsü aser ceasefire alitsü ajungshir. Berlin-i par tembar France, Britain aser Canada linüktem ama September ita Palestine ya linük ka ta agizüktsübo mashir. Saka Brehostibarnü Wadephul Israel-i aotsü lia, anatsülen nüburtem asoshi yimjung alitsü atema lenmang ajak agi "two-state solution" ya dang lir ta Germany tangatetba nung lir ta ashì. "Germany asoshibo Palestine nunger linük ka ayizüktsü ya tatem nung asütsüla. Saka iba ama inyakyim tang nungi tenzüksüla. Iba nükjidong nungi Germany mainshitsü," ta Wadephul-i ashì. Trump indang special envoy Witkoff ya Brehostibar nikongdang Israel tonga aru aser Ato Kilonser Benjamin Netanyahu den ajurutepa humanitarian tensa aser ceasefire atema jembi, ta ketdangsür kati tenüng miima ashì. Hopta ka tejakdang Qatar nungi Israel aser US nati Gaza ceasefire asoshi jembishinürtem meyipa ajaba sülen Witkoff aser Netanyahu tang mezüng ajuruteper alitsü. Iba mapang Hamas-i rara anentsü tejangraba mesayur, ta Witkoff-i shia liasü. "Gaza nung Humanitarian Crises tatem kati arutsü asoshi tekeratiba lenmangji Hamas-i SURRENDER SÜR PUA ALIRTEM CHIOKTSÜBA ya lir!!!" ta Trump-i pa indang Truth Social sapang nung Brehostibarnep zülua liasü. Nisung takum kumzüktsü aser mepetmesü tembangtsü atema Trump-i Witkoff ya yoker, aser tiri nisung meimchir asoshi bilemer, ta White House press secretary Karoline Leavitt-i ashì. October 7, 2023 nü Hamas-i Israel south tsütsü maka nisung 1,200 tepseter ano nisung 251 pua bener aoba sülen rara ya tenzük. Israel-i tayang kepzüka amakba nung Palestine nunger nisung 60,000 dak tema tepsetogo, ta Gaza indang Health Ministry ajanga ashir. Pua bener aortem Hamas ket nung tang nisung 50 lir aser item rongnung nisung 20 shi takum alitsü südi ta amanger.

35buba Nagaland Taekwondo Championships tembangogo



Dimapur, Luroi/August 1 (TYO): 35buba Nagaland Taekwondo Championships shibangba sentong July 31 nü Multi-purpose Indoor Stadium, Longleng nung agiogo. Iba sentong nung Director of Youth Resources and Sports, Kethosituo Sekhose alakteta jaoker liasü.

Sentong nung o jembiba mapang alakteta jaokeri, pa jaokba atema asayamung ayongertem dang kanga pelaba lemsatep. Paisa, tang tashi nung taküm iba asayamung nung asayartem timbai shilem agiogo ta ashiba den iba ya state ajunga nung tajungtiba ayongzükba asayamung rongnung ka lir, ta ashi.

Sekhose-i ashiba agi, pai Longleng nung Yingli College aser tanga tesem balala semdangba mapang timla aser terenlok nguogo aser Chief

Minister lenisüba nung terenlok aika arutsü ta amanger.

Pai, tang state nung indoor stadium 31, futsal ground 20 aser football turfs 6 teyangludak lir aser district ajak nung yanglutsütsü atema inyakdar, ta ashi. Paisa, iba ajanga yakta district tem ajangzüksü ta temulunglema bilemba lemsatep.

Maneni alakteta jaokeri, tsürapurtem shirnokisa pei tanurtem Taekwondo asayatsü atema ajungmesogo parnok nem tenüngsang agütsü aser ashiba agi, iba ya asaya ka dang masü saka taküm libaliro azüoktsü atema yimya tajung sayutsü aser tekelok chiradaksütsü atema tongtibang lir.

Sentong nung Convener organising committee L.T. Hendok Phom-i tepela o jembia liasü.

Taküm iba asayamung nung best referee award Anirudra Pandey nem, best female fighter award Visazuno Sachu nem, best male fighter award Vilabizo Nagi nem aser best discipline team award Longleng District nem agüja liasü.

Iba asayamung nung champion ji DYRS Kohima team liasü. Parnoki gold 17, silver 2 aser bronze 2 ngua liasü. Dimapur team first runner-up liasü aser parnok gold 10, silver 10 aser bronze 6 angu aser second runner-up Wokha district team-i gold 10 aser silver 10 ngua liasü.

Sentong ya Manngai H. Phom lenisüba nung agi, Pastor Ao Baptist Church Longleng, Meren-i Tsüngrem temaotsü meshizüka sarasadem aser M. Phammei Phom-i ken tajung ka tena liasü.

Liverpool-i Isak atema bid asüba Newcastle-i magizük



Alexander Isak

Luroi/August 1, 2025 (Agencies): Liverpool-i striker Alexander Isak atema bid asüba Newcastle United-i magizük.

Newcastle-i Sweden nung international asaya ya pound million 150 langa lir ta shiogo aser Liverpool puri pa atema bid asüba ya parnok asoshi teperi masü.

Liverpool puri pa atema sen kwi agütsütsü benok aji mejangja, saka pound million 110 den add-ons densema alitsü ta osang ajanga metetdaksüogo.

Pre-season Asia tour atema Isak ya Newcastle squad nung

mezüngoksem, kechiyong club pur taruba season Champions League asayatsü qualify sür liaka pai tanga club nung oa adentsü tejangraba aliba lemsatepa liasü.

Isak tarutsü mejangjai tang pa taoba mapang asaya aliba club Real Sociedad nung training agia aliba mapang Liverpool-i pa atema bid süogo.

Arishi küm 25 tain asaya ya Newcastle nung 2022 küm La Liga club Real Sociedad nungi pound million 60 yong oa aden.

BBC Sport-i July ita sangdong ka ajanga ashiba agi,

Liverpool puri Isak atema pound million 130 tashi agütsütsü mulunga lir.

Newcastle-i pa mayoktsü ta shia aruogo, saka Liverpool puri pa alizüksü tejangraba aliba mesamai lir.

Premier League champions yagi taoba ita Newcastle dang pa alizüksü atema asüngdang aser tang official bid ka benokogo.

Isak atema Liverpool puri jenjang melenshir bid süshitsü mesüshitsü mejangja, saka manager Arne Slot-i pa ya kanga alizükner.

Liverpool puri tang transfer window nung Florian Wirtz, Hugo Ekitike, Milos Kerkez, Jeremie Frimpong, Giorgi Mamardashvili aser Armin Peci nung add-ons mendeni pound million 265 agi alizükogo.

Kasa mapang nung parnok first-team nungi asayar Luis Diaz, Jarell Quansah, Caoimhin Kelleher aser Trent Alexander-Arnold nung pound million 115 agi yokogo.

Macau Open: Sen aser Tharun na semifinals-i iogo

Luroi/August 1, 2025 (TYO): Tang asaya aliba Macau Open Super 300 badminton tournament nung Hokolbarnü India nung asayar Lakshya Sen aser Tharun Mannepli nati Xuan Chen Zhu aser Hu Zhe na den pei tata asaya koka semifinal-i iogo.

Sen-i 21-14 18-21 21-14 agi Zhu madak takok angu aser kasa mapang nung arishi küm 23 tain Mannepli-i ghonda ka ser minute terpongu kanga meranga asayar 21-12 13-21 21-18 agi Hu Zhe koka liasü.

Iba asaya akokba sülen Mannepli tang mezüngbuba BWF Super 300 asayamung ka nung semifinal tongtetogo. Taküm pai February ita German Open nung quarterfinals tonga asayar liasü.

Mannepli, shiba küm pezü tejakdang Pullela Gopichand Academy nung züngoksema liasü, pa toba küm ana fitness, agility, aser movement dak rangloker asaya aruogo. Pai kanga meranga inyakba süngja iba hopta tanga pai

quarterfinals nung Hong Kong nung top seed asayar Lee Cheuk Yiu koka liasü.

Asaya nung mezüngbuba game nung Mannepli 4-7 agi tesülen aliba nungi meyipa tur 12-9 aküm aser 15-11 aliba mapang point trok atonga ngua pai asaya akok.

Tanabuba game nung Hu-i temulungtetba tulu nung asaya aser pa 6-2 agi tejakdang aküm aser maneni 15-6 agi pa point timba aküm aser iba sülen Mannepli nem memenedaksüi asaya akok.

Deciding asaya nung Mannepli yakdang dang 5-0 agi tejakdang aküm aser 19-15 tashi pa tejakdang liasü. Ajisüaka iba sülen pai point asem laluba ajanga jenjang mejungi aküm, saka maneni pai süngjemshir asaya-a asaya akok.

Kasa asayamung tebur tarep asaya nung Satwiksairaj Rankireddy aser Chirag Shetty quarterfinal nung Malaysia nung tarep Choong Hon Jian aser Haikal Muhammad nati 14-21, 21-13, 20-22 agi kokogo.

Khalid Jamil India tebur football team coach kümogo



Luroi/August 1, 2025 (Agencies): Khalid Jamil, Indian national tebur football team head coach asütsü shimogo. Pa ya küm 13 sülen India nung rongnungi mezüngbuba coach lir.

All India Football Federation's executive committee-i arishi küm 48 tain taoba mapang India nung international asayar ya Hokolbarnü nisung asem shimdang aliba nungi shima liasü.

Jamil, shiba tang Indian Super League club Jamshedpur FC indang coach lir, pa ya 2017 küm Aizawl Football Club pur I-League takok dangi aniba atema ajaki kanga jangja meteta lir.

Coach atema shimshiba inyakyim nung taoba mapang striker IM Vijayan-i anir AIFF Technical Committee-i candidate tem kar asadangtsü atema shimdangba densema

liasü.

Parnoki asadanga tanga candidate tem rongnung taoba mapang India head coach Stephen Constantine aser taoba mapang Slovakia national team manager Stefan Tarkovic nata densema liasü.

Jamil-i iba mapa ya Spain nung coach Manolo Marquez ket nungi agizükogo, shibai taoba ita iba mapa tokja liasü. India team-i junga masayateti aruba sülen Manolo-i India national team coach mapa ya tokja liasü.

India nung rongnungi tatembangbuba national team head coach ya Savio Medeira liasü, shibai 2011 aser 2012 küm iba mapa bona liasü.

Jamil mapa ya Central Asian Football Association (CAFA) Nations Cup nungi tenzüksü, koba August 29 nü nungi Tajikistan aser Uzbekistan na nung asayatsü lir.

BILEMDANGANG

"Nisung timba kati agizükaka tai jibo teti tai dang asütsü."